

四庫全書

史部

欽定四庫全書

史部

欽定蘭州紀畧卷十七
五至

編修臣李傳熊覆勘

總校官編修臣程嘉謨

欽定四庫全書

欽定蘭州紀畧卷十五

壬午阿桂李侍堯畢沅奏言伏思陝甘二省乃三秦重地東連豫晉西達新疆北控邊城南通楚蜀兼以崇山峻嶺重複迴繞四面則番族環居內地則民回錯處習俗剛勁為自古用武之地仰蒙

聖明燭照

睿慮周詳以陝甘二省近年以來各營官兵裁撥太多

地廣兵單節次

特降諭旨令臣等酌量添設誠慎重邊陲為永遠救寧之至計也惟是添兵之大要有二一則督提鎮標各有兵數千屹然巨鎮勤加訓練平時既可資彈壓臨時又足以供調遣一則緊要營堡各有兵數百分防駐守時加稽察則聲勢既可聯絡奸宄不至潛藏查甘肅督提四鎮除提標及寧夏鎮標毋庸議添外其督標五營地居省會控制宜嚴現存

實兵一千五百三十八名今請設兵三千名應添
兵一千四百六十二名肅州控扼嘉峪內外為新
疆門戶地居衝要現存實兵一千八百三名今請
設兵二千四百名應添兵五百九十七名西寧鎮
標現存實兵二千二百九十五名今請設兵二千
五百名應添兵二百五名涼州鎮標現存實兵二
千一百四十五名今請設兵二千三百名應添兵
一百五十五名河州以協改鎮現存實兵九百十

名今請設兵二千名應添兵一千九十名陝西撫
標現存實兵七百五十名今請設兵一千名應添
兵二百五十名提督從前本駐固原為甘省東路
襟喉且其地去西安蘭州均不過六百餘里呼應
既兩省可通而西控鞏秦北連延慶均有指臂相
聯之勢自乾隆二十九年移駐西安固原改設總
兵兩處額兵隨亦裁減現存實兵一千三百五名
今提督仍駐固原改設提標五營請設兵三千名

應添兵一千六百九十五名至西安提鎮現存實
兵一千七百四十五名提督業已移駐固原雖有
將軍副都統大員不能兼轄六營若歸入撫標統
轄究係文臣不能專心訓練且提標所屬潼關富
平宜君等營俱在西安東南如仍令固原提督管
轄亦恐鞭長莫及請設兵二千一百名應添兵三
百五十五名分中左右三營另設西安鎮總兵一
員專司操演兼轄附近營汛其兩營官弁即隨提

督移駐固原至陝西延綏興漢二鎮其延榆一帶
外接土默特鄂爾多斯阿拉山諸部落久為臣僕
中外一家無須重兵防範惟興漢一鎮與四川湖
廣毗連山谷險阻林木深邃週圍三四千里最易
納匪藏奸關係緊要舊存實兵一千四百七名今
請設兵二千名應添兵五百九十三名至緊要營
堡如河州鎮屬之循化起台保安臨洮西寧鎮屬
之歸德南川北川巴燕戎格巴暖碾伯肅州鎮屬

之嘉峪關紅崖堡梨園洪水南古城馬營墩涼州鎮
屬之莊浪岔山口安遠張義堡寧夏鎮屬之花馬
池同心城靈州橫城西安鎮屬之潼關神道嶺慶
陽紅德長武邠州西安城守興漢鎮屬之白土漁
渡紫陽七里關舊縣關陽平關寧羗畧陽漢鳳漢
中城守興安城守固原提屬之靖遠下馬關蘆塘
西安州永安堡八營堡洮岷鞏昌秦州平涼階州
文縣西固岷州舊洮蘭州城守紅城苦水各等處

現有兵額均不敷防守應請添兵自數百名至數十名不等庶可以守要隘而脩捍衛至安定為鞏昌分汛相距不及二百里駐兵百名把總一員足資防守臣等通盤核算甘省添兵六千五百八十二名陝省添兵六千三百五十八名統計二省衝繁扼要營汛共請添兵一萬二千九百四十名除勒爾謹於上年

奏准酌復公糧兵二千名外現在實添兵一萬九百

四十名臣等又查向例添兵必須添設將備等員
并於所添兵額內又多佔養廉名糧於事無益今
以提督移駐固原所有請設西安鎮止須安設中
左右三營將前後二營遊擊守備以及千總外委
等一併裁移固原以復五營舊制至河州設鎮應
添左營中軍遊擊一員即以陝西紅德城遊擊裁
移守備一員即以永安守備裁移至循化廳控制
番回尤關緊要本設兵八百名舊設遊擊一員尚

不足以資彈壓應以鎮海叅將移駐而以循化遊擊改駐鎮海之丹噶又循化應添守備一員即於哈拉庫圖爾營裁移紅城堡應設守備即以永固協屬之黑城都司裁改其餘各該處應添千總外委等亦均於各營內籌酌裁改總期添兵萬餘而將備毋庸多設以歸實用再前奉

諭旨兵丁有馬步守三項之分各省大約以馬三步七為率今既酌為添設不如竟將馬兵酌添六七千名

等因欽此伏查陝甘兩省各營制有馬步各半者馬
六步四者馬三步守各半者有馬三步三守四者
俱屬參差不齊大約提鎮各標地居都會及各府
平原曠野馬兵自較步守為優而操演亦易得力
至僻遠險要營分跬步皆山路徑叢雜無所用騎
又應多設步守臣等按各該營舊制於新添兵一
萬二千九百四十名內共請添馬兵五千五百八
十一名步兵四千二百四十四名守兵二千九百

五名外添公費馬步守兵共二百十名至金城關
離省城不過二里逼臨黃河與省城聲息相通似
可毋庸添兵且該處地方逼窄祇可安設汛兵防
守巡緝不能駐扎將領大員是以未列添兵單內
奏入

上勅軍機大臣會同該部議奏旋經尚書額駙公福隆
安等議言查向來西安將軍原設滿洲兵七千名
節經移駐裁減止存三千七百餘名所有西安提

標現存之兵應請添足二千一百名照成都將軍兼轄漢兵之例設立軍標中左右三營即令該將軍一體管轄與滿洲兵就近訓練以成勁旅其另設西安總兵之處應無庸議至河州西安肅州涼州寧夏西安興漢固原等處各提鎮所屬營堡如循化起台等處或關隘層疊或汎廣差繁在在俱關緊要應如所議河州鎮屬之循化營請設兵八百名應添兵三百三十名保安營請設兵五百名

應添兵三百三十八名起台堡請設兵二百五十
名應添兵一百五十三名臨洮營請設兵三百名
應添兵一百六十五名大通協請設兵六百名應
添兵一百三名永安營請設兵五百名應添兵一
百十七名鎮海堡請設兵二百名應添兵五十三
名歸德營請設兵七百名應添兵四百五名南川
營請設兵一百五十名應添兵二十名亦雜石營
請設兵八十名應添兵十六名千戶莊營請設兵

五十名應添兵二十五名北川營請設兵一百五十名應添兵三十四名巴燕戎格營請設兵三百名應添兵五十一名巴暖營請設兵一百五十名應添兵十八名康家寨營請設兵六十名應添兵二十名乜思觀營請設兵四十名應添兵十三名碾伯營請設兵一百五十名應添兵四十名肅州鎮屬之嘉峪關請設兵三百五十名應添兵七十九名鹽地堡請設兵八十名應添兵四十一名紅

崖堡請設兵一百名應添兵三十一名黎園營請
設兵一百五十名應添兵七十五名洪水營請設
兵三百名應添兵六十名南古城請設兵一百五
十名應添兵八十四名馬營墩請設兵一百名應
添兵十七名涼州鎮標五營三邊重宇控制羣番
請設兵二千三百名應添兵一百五十名涼州鎮
屬之莊浪營請設兵五百名應添兵一百五十
四名岔口營請設兵二百名應添兵九十四名安

遠營請設兵二百名應添兵六十六名古浪堡請
設兵一百名應添兵六名黑松堡請設兵八十名
應添兵二十二名武勝營請設兵五十名應添兵
七名張義堡請設兵一百三十名應添兵七十三
名西把截營請設兵一百名應添兵三十一名寧
夏鎮屬之花馬池請設兵四百名應添兵一百三
十三名同心城營請設兵一百名應添兵十七名
惠安營請設兵五十名應添兵十一名韋州營請

設兵五十名應添兵十一名靈州營請設兵四百
名應添兵二十一名西安城守營請設兵三百六
十名橫城營請設兵一百五十名應添兵二十一
名應添兵八十一名慶陽協請設兵三百五十名
應添兵八十二名長武營請設兵二百二名應添
兵七十一名邠州營請設兵一百九十名應添兵
六十三名涇州營請設兵一百五十名應添兵三十
三名潼關協請設兵六百五十名應添兵一百六十

名神道嶺營請設兵一百五十名應添兵十二名
興安城守營請設兵三百二名應添兵一百十二
名白土路營請設兵四百名應添兵五十名漁渡
路請設兵四百名應添兵五十二名紫陽營請設
兵四百名應添兵一百二十名七里關營請設兵
二百名應添兵六十一名舊縣關營請設兵五百
名應添兵二百九十六名漢中城守營請設兵六
百名應添兵一百十八名漢鳳營請設兵五百名

應添兵九十九名陽平關營請設兵三百名應添
兵六十五名寧羗營請設兵四百名應添兵一百
三十六名畧陽營請設兵三百名應添兵二十七
名固原城守營請設兵五十五名應添兵一百五
十名靖遠協營請設兵四百四十名應添兵一百
六名下馬關營請設兵一百二十一名應添兵五
十九名蘆塘營請設兵一百名應添兵六十六名
西安州營請設兵一百十名應添兵二十七名永

安堡請設兵九十名應添兵二十九名八營堡請
設兵六十七名應添兵二十名洮岷協營請設兵
六百三十五名應添兵八十五名階州營請設兵
四百二十名應添兵五十九名文縣營請設兵二
百八十名應添兵三十名西同營請設兵二百四
十名應添兵四十七名岷州營請設兵六十名應
添兵一百四十四名舊洮營請設兵二百一十名
應添兵六十八名秦州營請設兵二百三十名應

添兵二十八名鞏昌營請設兵六百六十名應添
兵三百五十四名鞏昌營應駐兵一百名即於鞏
昌營撥足一百名蘭州城守營請設兵五百一十
名應添兵一百五十名金縣營請設兵五十名應
添兵十三名紅城堡改設守備營地當孔道請設兵
一百名應添兵七十一名苦水堡請設兵五十名
應添兵三十名平涼城守營請設兵五百名應添
兵三百五十三名至所議外添公費兵共二百十

名尚係相沿成例現在欽奉

上諭各省營伍所有賞卹等項俱著於正項支給等因
欽遵在案其所請外添公費兵應毋庸議又添兵
必須增設將備等員應如所議西安提標現已議
歸西安將軍管轄應即將原設提標之中左右三
營作為軍標其應設中軍副將一員即以原設中營
遊擊改補應添設中軍都司一員其中營守備及
左右二營之遊擊守備千把外委等俱有原設員

升無庸增設至固原移駐提督應添設兩營即以
西安應設提標前後二營遊擊守備及千把外委
等員升裁移固原至河州設鎮應仍設左右二營
其左營應添中軍遊擊一員即以陝西紅德營遊
擊裁移其原設左營都司一員改為右營都司守
備一員即作為都司中軍右營應添千總一員於
臨洮營裁移右營應添千總一員於寧夏興武裁
移應添把總一員於哈拉庫圖爾營裁移應添經

制外委二員即在左右兩營額兵內拔補又循化
應添中軍守備一員於哈拉庫圖爾營裁移應添
千把總各一員於寧夏中衛營裁移應添外委二
員即在該營額兵內拔補其鎮海營改設遊擊即
將舊有千總一員作為中軍哈拉庫圖爾營應添
千總一員於大通協裁移歸德營應添把總一員
於永安營裁移應添外委一員即在該營額兵內
拔補永安營舊有千總一員即作為該營遊擊中

軍十總保安營應添把總一員於肅州金塔寺營
裁移寧夏興武營舊有把總一員即作為都司中
軍紅德城營原駐遊擊既撥移河州鎮標其紅德
城營以延綏鎮營羅協清平堡守備移駐其清
堡事務以寧塞堡分防寧備梁汎把總移駐所有
寧備梁汎即以清平堡經制外委移駐至紅城堡
應設守備一員以永固協城之黑城都司改補同
原設弁兵按數移駐其紅城堡把總一員同兵丁

移駐黑城黑城止留原設總兵一員經制外委一員額外外委一員其餘經制額外外委各一員一同移駐紅城堡改屬涼州鎮管轄其餘均應如所議辦理奏入得

旨如所議行

同日阿桂李侍堯又奏言查甘省額設兵五萬六千六百零一名除節次裁撥移駐扣留公糧並公費養廉屯防兵二萬二千九百七十名外實存兵

三萬四千五百四名陝西額設兵三萬四千五百
九十二名除節次裁撥移駐扣留公糧並公費養
廉屯防兵一萬三千一百七十四名外實存兵三萬
一千四百一十八名通計陝甘二省共存兵五萬
五千九百二十二名較原額少兵三萬五千二百
七十一名內歷年裁撥移駐新疆養兵九千七百
六十名各官養廉公費九千七百七十五名及屯
防兵七千八百五十四名扣存公糧七千九百三

十名至公糧因何扣存不補之處查係乾隆二十
一年前督臣黃廷桂任內因陝甘兩省辦理軍需
綠折各營公私借墊頗多欽奉

諭旨免其扣抵奏准於兩省兵數內酌扣公糧十分之
一共銀二十四萬六千五百餘兩通融彌補嗣於
二十六年扣案清完即將此項節省銀兩歸入新
疆經費項下調用支銷至畢沅前奏陝省此時兵
力合計不過萬餘一節其意因固原鎮雖屬陝西

提督管轄而所管各營則在甘肅地方故未列入
且彼時提標及興漢延綏兩鎮俱以派調兵數千
是以止剩萬餘其甘省存兵雖尚有三萬四千餘
名但一提四鎮與各協營以至嘉峪關外安西河
州靖遠三營東西南北相距數千里地方遼濶堡
戍繁多所有額兵除派安墩汛隘口及遠近差使
外其實在存營差操兵已屬寥寥且逆匪起事時
省城一帶兵力單弱遠處徵調緩不濟急倉猝之

際更不免左支右絀此當日實在情形也再部中所查兵數與現在迥不符合其故總因養廉公費俱佔名糧一經裁移改撥牽混不清不特難於查核且恐易滋弊竇應請嗣後陝甘兩省每年造具兵冊送部時將實在馬步守兵為一冊其養廉公費兵另為一冊如此則案牘不至混淆而支銷各有定數較為妥善如蒙

俞允並請

敕下該部通行各省均照此辦理入奏

上敕原議大臣一併議奏旋經尚書額駙公福隆安等

奏言查陝甘二省現存實兵較原額共少三萬五

千二百七十一名業據大學士公阿桂等酌請添

補經臣等議准具

奏至兵丁賞卹銀兩現奉

諭旨俱於正項支給報銷所有陝甘扣存公糧公費各
款應令該督等查明核辦又陝甘節年開報兵數

應令該督撫各按省分將實在正額馬步守兵為一冊其屯防移駐各兵另為一冊分晰造報庶額兵定數相符不致牽混滋弊併通行各直省一體遵照辦理奏入得

旨如所議行

同日阿桂李侍堯又奏言竊照營伍之制其應歸各提鎮管轄者必須遠近適中始足以重操防而嚴控制陝甘二省現已遵

旨增添兵額以備捍衛所有各路營協堡汛有宜斟酌
變通者如西安提督仍駐固原除應設中左右前
後五營外其原屬固原鎮之固原城守靖遠蘆塘
西安州永安堡八營平涼秦州鞏昌九營應改歸
固原提督統轄又西安提督原管之慶陽協紅德
涇州兩營應仍歸固原提督統轄西安添鎮仍設
中左右三營外其提督原管之西安城守潼關協
神道嶺商州金鎖關富平西鳳宜君各營應歸西

安鎮統轄又邠州長武二營原隸慶陽協查該營
在陝西地方距西安較近應改歸西安鎮統轄河
州改鎮應設左右二營外其原管之循化保安起
台臨洮並撥歸固原之洮岷舊洮岷州西固階州
文縣蘭州城守各營俱仍歸河州鎮統轄又紅城
苦水二營向係蘭州所屬該二處在莊浪迤東七
十里至一百二十里距涼州較近且在黃河迤西
應改歸涼州鎮屬之莊浪營叅將管轄至肅州鎮

向轄金塔永固二協嗣於乾隆四十二年將肅州
口外之安西協副將等十一營汎改歸肅州鎮屬
所管不為不多而永固協所屬各營俱在甘肅地
方向來一切文移由甘肅提督咨行肅州鎮復由
肅州行文永固往返迂迴每至稽遲貽悞應將永
固協並所轄甘州城守大馬黑城洪水馬營墩山
丹破口梨園南古城十營堡改歸甘州提督統轄
不惟文移往返不致紆繞而一切考驗巡查俱為

近便於軍政大有裨益奏入

上勅原議大臣一併議奏旋經尚書額駙公福隆安等
議言應如所奏辦理至西安現經臣等議請設立
將軍標其提督原管西安城守一營近在同城應
即歸將軍管轄其潼關協神道嶺商州金鎖關富
平西鳳宜君各營及慶陽協屬之邠州長武二營
應仍歸固原提督統轄以符舊制而重責成奏入
得

旨如所議行

同日阿桂李侍堯奏言陝甘二省兵丁遇有紅白
賞卹事件向來於惠濟項下動支陝省原有銀六
萬三千兩甘省原有銀十一萬三千餘兩俱交商
營運每年所得息銀除賞給兵丁紅白事件外尚
有盈餘自乾隆三十三年停止以後所有陝省惠
濟銀六萬三千兩又以息作本并存剩息銀共十
萬六千七百七十餘兩甘省惠濟銀十一萬三千

餘兩又以息作本併存剩息銀共十五萬三千四百餘兩概行撥充兵餉等項其陝省兵丁紅白賞銀在朋合銀內支給甘省兵丁紅白賞銀在裁馬改步節省銀內支給查裁馬改步及朋合二項銀兩雖係就各營中通融節省而其賞仍歸於開銷帑項況甘省現請添兵六千五百餘名內添馬兵二千七百餘名所有裁馬改步節省銀兩自應仍撥充現添馬兵之用若既添馬兵而復摘缺停補

於體制更屬未協至陝省現添兵六千三百餘名
朋合一項亦恐不敷支給皆須另請動款撥補伏
思

皇上添設陝甘兩省兵額原為捍衛邊陲起見不惜多
費帑銀第

國家經費有常亦不可不通盤籌畫前各省撤回惠
濟銀兩緣生息名色

特勅停止查此項銀兩雖屬交商營運而所獲息銀俱

為豫備賞卹兵丁之費

國家本無取利於其間臣等公同籌酌陝甘兩省現請添兵一萬二千九百餘名併原有兵五萬五千九百二十二名其從前惠濟銀兩似當仍請復設惟查原定交商營運甘省係一分五厘起息陝省則一分五釐一分二釐不等定數未免稍重可否

仰懇

天恩概定一分二釐以下行息餘俱查照舊例遵辦再

欽定四庫全書

欽定四庫全書
卷十五

臣阿桂前在雲貴知該省自停止生息銀兩後所有兵丁紅白事件俱以裁減兵額節省銀數充賞查滇黔等處俱係邊陲兵力亦不宜單弱若將生息銀兩復舊即所裁兵額仍可補足於防守實為有益其他四川閩廣或係邊地或係海疆亦關緊要容俟臣阿桂回京後查明再行請

旨辦理奏入

上命軍機大臣傳諭阿桂李侍堯曰據阿桂等奏請酌

復惠濟銀兩以裨營伍一摺固為兵丁需費起見添
兵自當添賞卹然總屬無多且現在所有兵丁其賞
卹本即動用正項也其果有不敷之處以致不行賞
卹乎著奏聞國家賞兵之費藉商營運支給其名究
屬不美況現在戶部庫項充盈即陝甘二省添設兵
丁所需紅白賞卹費用較多原當開銷正帑著傳諭
阿桂李侍堯畢沅所有此次添兵之費及將來陝甘
二省兵丁紅白賞卹事件俱著動用正項開報

同日阿桂李侍堯奏言臣等遵

旨確查甘省奏請添建倉廩一節查工部單內所開甘
省自開捐以後共請添建倉廩二十七案臣等將
各廳州縣未經開捐以前倉間糧數與詳請添建
時現存糧數比較內西寧大通靜寧三州縣合監
糧常平額徵各項糧石而計尚不及乾隆三十九
年以前舊存糧數此外隆德淵泉安西玉門敦煌
肅州高浪三岔州判禮樂西和清水徽縣成縣古

浪洮州廳十五廳州縣雖查詳請建倉時糧數比
從前增減不等但甘省捐監現據各該員供稱俱
係以銀抵糧並不買補還倉其實貯糧數仍較舊
額短少臣等伏思建倉所以貯糧今糧石既無贏
餘何用添設廩座明係該員等借添建為名以為
侵蝕公帑之計此等捏報劣員即係現在審明冒
賑開銷之人將來歸案辦理時自當一併定擬完
結但該員等種種藉端捏冒情節更重俟分發人

員到甘省先行叅革審辦所有西寧隆德十八廳
州縣添建廩座二十三案應請

勅部無論曾否建蓋概不準開銷其部中已銷者查明
詳請之員及各上司分賠未銷者即行扣除如銀
兩業經給發即一併追繳至撫彙廳及張掖永昌
二縣所存糧石較多舊有倉廩不敷藏貯向來皆
係借貸民房廟宇堆積添建尚係有因但是否實
在蓋造亦難憑信臣阿桂已派軍機司員數倫泰

前往查勘另行具

奏奏入

上諭內閣曰甘省監糧一項既屬紙上空文乃該員等復借建倉為名恣其侵冒是又於冒賑開銷之外設法侵欺其情節較冒賑各員更重將來審明定案時必當加倍治罪以為貪婪狡詐者戒

欽定蘭州紀畧卷十五

欽定四庫全書

欽定蘭州紀畧卷十六

乙酉

上諭內閣曰國家設兵衛民簡核軍實期于行伍整齊
兵額充足如兵丁等紅白事件從前設有生息惠濟
銀兩以資賞卹其後特勅停止昨據阿桂等奏陝甘
添兵案內籌及賞卹聲請酌復惠濟銀兩朕以國家
賞兵之費藉商生息支給究屬非宜已傳諭阿桂等

令其動用正項開銷矣茲袁守侗海祿前赴行在令
軍機大臣傳旨詢問直隸雲南賞兵銀兩支銷款項
據稱直隸裁扣公糧銀二萬兩雲南裁扣公糧銀一
萬六千餘兩以備賞用等語看來各省大都如此兵
丁紅白銀兩原係加惠營伍格外施恩若因此裁扣
名糧致兵額不足殊非核實營伍之道況今戶部帑
項豐盈各省藩庫積存充裕即現在京營添兵四千
九百名陝甘二省各營添兵一萬二千九百餘名其

馬步糧餉合之各省兵丁賞卹紅白銀兩約算歲支
尚不及百萬國家何靳此費不令開銷正帑而各省
乃紛紛裁扣名糧又且請復生息甚無謂也朕臨御
四十六年以來惟事事以敬

天勤民為念凡三次普免天下地丁錢糧兩次普蠲各
省漕糧以及遇災即賑統計何啻萬萬又並未加增
賦稅仰荷

上蒼嘉佑開拓邊陲府藏殷實國用充饒朕又豈肯稍

存靳惜致令有司開聚斂尅扣之端乎所有各省營伍賞卹兵丁紅白銀兩自乾隆四十七年為始俱著於正項支給造冊報部核銷至各省提鎮以下武職員弁俱有應得坐糧馬乾等項前業經降旨通諭各省督撫將各該省武職所得公項逐一查明覆奏俟奏報到齊令軍機大臣會同該部核辦照文員之例議給養廉其所扣兵餉即可挑補實額核計添給養廉歲支亦不及二百萬兩官員既無拮据而各省又

增添兵力於營伍大有裨益朕御極之初戶部庫項
不過三十萬兩今已增至七十餘萬復有何不足而
不加惠天下散財以得民乎所有辦理添補兵額紅
白賞卹銀兩及名糧裁添養廉緣由明晰曉諭中外
知之

丙戌左副都御史吳玉綸奏言甘省自乾隆三十
九年開例捐監原為專收本色儲倉穀以恤災黎
乃報捐者竟全係折色固由甘省承辦官員借捐

冒賑舞弊分肥該生等明知折色違禁因較本色
省費實多是以避重就輕相率滋弊比年來赴部
捐監者日少而在甘報捐遂至數十萬之多生監
為士子進身伊始豈容如此取巧營私茲蒙

皇上格外

鴻慈免其褫革但以所繳折色數十兩即安然濫廁成
均比之京監數目懸殊似不足昭平允而杜倖獲

臣
請

勅下該部凡甘省自三十九年以後報捐監生現奉

恩旨免其斥革者每名令其補繳銀六十兩由各該生繳
本籍各州縣彙解藩庫由該督撫按季彙摺陳奏以
備甘省災賑撥用並請勒限二年繳完如逾限不
繳即將該生原照查銷奏入

上諭內閣曰據吳玉綸奏甘省自三十九年以後報捐
監生每名令其補繳銀六十兩等語所見甚小王亶
望等私收折色一案朕本不欲辦恐各省因此諱災今

種種弊端水落石出伊等于光天化日之下竟敢明目張膽網利鬻官致朕不得不辦之苦衷天下後世共見之然侵漁各員已將伊等平日私收冒銷婪得賍私查抄入官亦足抵該省浮開冒賑之數若又令各捐生紛紛補繳是轉開鎗銖較利之端于國家政體甚有關係朕不為也吳玉綸此奏不准行至該生等明知折色違禁乃相率報捐亦不可不加懲儆所有乾隆三十九年甘省開捐以後報捐監生者停其

鄉試三科已經中舉者停其會試三科其加捐職官
現任者罰俸三年捐納職官未經銓選者俟到班三
年後方准銓選其在各館充當謄錄者着五年期滿
後再効力三年俱以奉旨之日為始查明扣算其止
捐監生頂帶榮身者着加恩毋庸查辦

戊子阿桂李侍堯奏言查撒拉爾回人分居十二
工離循化地方近者數里遠或數十里皆地處邊
外與諸番邊界毗連其風俗情形迥非內地可比

今送回蘇四十三等已就駢誅新教餘孽俱已勦除淨盡_臣等查十二工地方惟漢大寺孟達夕廠三工俱係舊教並無新教其蘇四十三所住之查家工韓二個所住之清水工及張朶別列草灘崖慢蘇只街子打蘇古等七工俱係新舊錯居現在止存舊教二千六百四十八戶其新教業已殲除所有遺存籽種地共二百三十四石零應上額糧十九石零並查各工地畝多係山頭地角依崖傍

壑零星沙地不成片段

臣

等伏思逆回所遺田土

現散在九工之內若令內地民人前往耕種則一

村之內民少回多勢不能彼此相安若於各工零

星安設訊地少則孤懸邊外難資彈壓多則徒費

錢糧

臣

等公同籌酌此次勦除逆匪所有隨同打

仗之舊教回人頗為奮勉出力其節次打仗傷亡

土兵共有三百三十餘名現在造冊咨部議卹可

否仰邀

皇上天恩即以逆匪所遺之田土賞給陣亡土兵等家
屬交土司韓煜韓光祖確查田土數目酌量人戶
多寡均勻派撥令其佃種按舊則輸糧仍由循化
廳徵收伊等每人名下所分籽種地不及一石無
慮地廣力增在衆回効順捐軀者受賞獨優亦必
益深悅服而陣亡之戶荷蒙

恩賞得以安居樂業尤必感激

聖慈輸忱向化奏入

上從之

同日阿桂李侍堯又奏言

臣等前奉

諭旨令將蘭州省城展寬跨山臨水仰見我

皇上慎重巖疆圖維久遠至計伏查營建城垣必須佔據

形勢方可設險衛民大抵因山為城則當包括山

之岡脊若平坦處建築又須距山稍遠蘭州北

臨大河西南兩面俱山嶺重疊惟城東一帶地稍

平衍省城舊係州治規模本小其後添築三面外

城不過就民居所至隨意斲治全無遠慮所以與龍尾山地勢緊要而外城西南之安定門離龍尾山尚有一百四十餘丈外城西門至龍尾山則僅止數十丈且山高於城此次撒拉爾逆回一至蘭州在龍尾山憑高向城攻打守城兵夫無可遮蔽且該處商賈湊集居民稠密又未預留火道居民牆屋直接城垣賊匪攀援攻撲是以即日而破然至外城失守賊匪力攻大城西門雖甕城券洞俱

被燒燬而大城終能固守無虞者則以賊至城下
勢須仰攻我兵登堞俯臨木石俱可擊退也但外
城之破究係以險資賊即使繕修高峻仍不足恃
茲蒙

聖明指示將西南城垣展寬至龍尾山梁俾西關一帶
居民及華林山之半俱包入城內實足以壯觀瞻
而資控制惟是龍尾華林兩山中有水磨溝一道
山水發時其勢頗猛難以跨築垣牆且龍尾山土

鬆沙汕每遇大雨時行即衝成溝坎或數丈或數十丈不等若於其上建築基址既不堅實斷難經久臣等公同商度惟有將大城向東展寬西自外城安定門起由拱蘭門迤東至風神廟後又自通遠門東南角起由迎恩門至廣武門北角止共擬新添城垣計長一千一百七十餘丈連舊城五百五十九丈共一千七百二十餘丈週圍約九里有餘雖東北地形稍覺狹窄而限於大河不能展拓

西南二郭城俱擬拆去共去舊城二千餘丈所有
大城甕城俱擬多添一層以為重關保障所有西
南兩關廂居民勸諭遷移撤去房屋空出地面寬
留火道則崇墉夾峙可以捍制邊陲至華林山近
在城西數里並可倚為屏蔽應於其上築營堡一
座移督標右營一營官兵在彼駐劄並於龍尾山
上相對大城西南一帶擇據形勢安設空心大墩
四處即於右營兵丁內輪派駐守平時則氣象更

覺嚴整有事則東可以護衛大城西可以接應華
林山營聲勢聯絡更足以資彈壓至此次籌改添
建各事宜工費浩繁且為永遠救寧之計必須鞏
固堅實應請

旨派熟悉城工之大臣一員帶領工部司員至蘭逐一
詳悉勘估方可興工辦理奏入得

旨如所議行

同日

上命軍機大臣傳諭阿桂李侍堯曰蘭州添建城垣一切興工估計自須熟諳工程之員前往辦理現在工部堂官惟侍郎德成于工程尚為熟練但盛京一帶辦理城工不便遽離該處所有蘭州城垣業經阿桂等相度已定俟德成於冬底回京時令其前赴蘭州勘估亦不為遲

同日阿桂李侍堯又奏言臣等屢奉

諭旨籌辦善後事宜除添設兵數改繕城垣專摺具

奏外謹將應行事宜酌議數條恭呈

御覽

一蘭州省城舊存子母砲十六尊僅與烏鎗無異
施放不能及遠又威遠砲八尊子重十六兩至二
十兩轟擊稍遠而施放時易于跳動難得準頭俱
不甚得力況年久亦多損壞此次攻勦賊匪照四
川劈山砲式樣製成二十尊並於涼州調到食子
六十兩大砲四尊轟擊頗為應用又查涼州鎮屬

各營舊貯大砲一百六十六位係前明萬厯年間製造厯年久遠多有脫落炸壞各營視同廢鐵其存貯涼州城內不過二十餘尊餘俱散貯各營堡容臣李侍堯特派熟悉砲位專員逐一勘驗將無用廢砲盡行銷燬試演堪用好砲分貯督撫提鎮駐劄各城如尚不敷揀選涼州匠役鑄造大神砲位酌定數目分貯至劈山砲亦應多為鑄造督撫提鎮大標約計兵丁二百名即給一尊並飭各營

時常拈演試放以期有准其陝西各標營亦如此
照辦

一回教相沿已久而新教則自馬明心口外回家
妄謂西域得有真傳愚回厭故喜新俱為煽惑以
致蘇四十三等肆逆不法今經此一番懲創之後
各處回民感懼愧悔出于至誠凡已習新教者俱
仍改從舊教現已嚴飭各屬將新教禮拜寺概行
拆燬如查有私行傳習陽奉陰違者照邪教律從

重辦理並曉諭回民不許稱阿渾名目於回民內
揀選老成之人令其充當鄉約隨時稽查互相勸
誡其舊俗相沿念經禮拜仍聽其便不准添建禮
拜寺及收留外來回人居住日後如有復倡異教
者即行首告拏如該處實無新教每年令鄉約
等聯名具結一次彙齊咨部查核仍先遍行出示
曉諭如此立法則新教自然淨盡

一撒拉爾回人散處十二工環遶循化廳地方每

年納糧八十三石各工回人至循化廳河州蘭州等處或貿易裁褐販賣牛羊本不禁止並有在循化河州充當衙役者以致新教黨羽漸熾與舊教互相仇殺起釁滋事此皆平日地方官不稽查拏究遂爾養癰貽患應請嗣後撒拉爾回人不准復充循化河州衙役及營伍兵丁亦不准其任意至內地行走其有往各州縣村鎮貿易者由循化同知給與照票定以限期事畢即令回巢將票繳銷

不許在各處逗遛並責成保安起台堡老鴉關駐
守弁兵嚴切盤查稽其出入仍隨時訪察毋令內
地遊匪潛往該處煽惑滋事亦不得借此勒措需
索違者皆重治其罪凡甘省各屬與番地土司境
壤毗連者均應一體仿照辦理

一鳥鎗為閭閻自衛之資從前曾奉

諭旨不必概行收禁況番回山居野處平日打牲為業
勢難禁用鳥鎗至硫磺為配製火藥所必需甘省

河東各年配造火藥取資于蘭州庫貯駱狐泉採
獲之磺河西各營取資于肅州玉門庫貯牛尾山
採獲之磺如果開採時並無透漏封閉後不敢私
挖番回何從私行偷買實皆地方官查禁不力所
致嗣後飭令該管文武員弁于封閉磺洞選派妥
役嚴行稽察屆開採時多派兵役嚴查又聞秦州
等處採磺亦有零星偷挖販賣者應通行嚴查封
禁不許絲毫透漏至律載內地私販硫磺五十斤

焰硝一百斤以上者杖一百徒三年窩藏國販知情者俱照私販律治罪應飭各地方官嚴查內地舖戶如有將前項礮斤聽審回潛行購買貪得重價或不法商民在番回土司地方私賣硫礮並私熬焰硝者均照私販及偷買律加等治罪仍令該管文武大員嚴飭所屬實力奉行並令將有無私販私賣情弊按季結報如敢虛應故事致滋弊竇一經發覺將文武各官及失察各上司一併嚴加

叅處

一新疆各城回衆以墨克地方為回教之宗主而內地回民又以新疆等處經典多而流傳為較真前奉

諭旨俟將來事竣後傳諭新疆各路辦事大臣嚴密查訪毋許內地回民在彼習學回經致生事端實為杜漸防微之至計臣等尚恐各城將緣事回民發至內地此等大概皆不安本分之徒與內地回民

皆係同教倘因其自西而來以為得有真傳或又相煽誘均未可定應請

勅下新疆各路大臣此後各城回民有犯發遣等罪者或於各城互相安插不必改發內地於杜絕新教根株之法更為周備

一循化地方已於添兵案內改駐叅將一員設兵八百名足資彈壓至循化同知係乾隆二十六年移駐該處原定疲難二項中缺應歸部選惟是該

處番回錯雜一切撫綏控馭必得幹練之員方可
勝任實非部選人員所能經理應請嗣後改為疲
繁難三項相兼要缺在外揀員題補又河州太子
寺距州一百二十里向設州判一員嗣於乾隆四
十一年裁汰查該州地方遠濶漠回雜處其東隅
之景古城離州城二百四十餘里附近之崦隴關
即係番地又正東之黑石山南之三渡水等處俱
離州城一百八十里及二百餘里不等均係習

俗黠悍之區一切稽查匪類撫馭番回該州鞭長莫及應請復舊制于適中之太子寺地方設立州判一員分防稽察其衙門及分駐事件各循其舊又該管之蘭州道原係驛傳兼巡蘭州向為衝繁難兼三要缺嗣因驛傳改歸臬司管理定為中缺歸部銓選伏查蘭州道雖止一府然地居省會為兩河扼要應仍舊改為衝繁難兼三要缺請

旨簡放庶人地相宜於體制亦屬允協奏入

上命軍機大臣會同該部議奏旋經軍機大臣等議言
均應如所奏辦理至私販硫磺及私熬焰硝若在
番回土司地方售賣即非內地私販可比查例載
附近苗疆五百里以內民人煎窰窩園興販硝磺
事發計斤定罪以次遞加五十斤以上者杖一百
流二千里至百斤以上者照合成火藥賣與鹽徒
例發近邊充軍又例載凡商漁船內夾帶違禁硝
磺等物接濟外洋者船戶以通賊論斬舵工水手

知情者同罪各等語是私販硝磺定例內地與邊
疆各有專條而境內私販與出境偷賣輕重迥異
今該省境接番回其私賣硝磺關係尤重應請
嗣後該省秦州等處產磺地方如偷挖熬煎番回
土司地方私賣係在內地者不得僅照尋常內地
之例問擬應比照附近苗疆五百里以內私販之
例計斤定擬分別軍流從重科罪若偷賣出境與
外地番回交易應比照商船夾帶出洋論斬知情

同罪之例審擬庶足以示懲創而嚴關守奏入得
旨如所議行

同日大學士三寶等奏言據閩浙總督兼管浙江
巡撫陳輝祖委員將王亶望案內前任蘭州府知
府蔣全迪押解前來奉

旨行在大學士九卿會同直隸總督袁守侗嚴審定擬
具奏_臣等公同研究緣蔣全迪係安徽歙縣人由
捐納知縣歷任甘肅皋蘭縣題陞肅州知州於乾

隆三十八年捐陞知府離任三十九年甘省奏請
開捐維時藩司王亶望即將蔣全迪奏留甘省題
補蘭州首府專辦捐監事務自王亶望到任後即
令各州縣公然俱收折色希圖上下分肥蔣全迪
亦圖從中取利遂慫恿王亶望行令各屬遵照辦
理其所收銀兩即藉災賑任意開銷蔣全迪與王
亶望商議凡各州縣報災之輕重及給發實收之
多寡俱由藩司衙門主政酌定分數開單給發各

屬令其照單開賑蔣全迪遂藉此勒索各州縣冒
銷辦賑銀兩又商議設立坐省長隨凡各州縣餽
送王宣望銀兩俱令坐省長隨送進蔣全迪希圖分
潤亦向各屬勒索餽送又蔣全迪署中所有親朋捐
監俱勒令各屬填給寔收並不發價蔣全迪擁有
厚資遂藉稱患病告假回籍迨王宣望陞任浙江
巡撫復將蔣全迪奏留浙省辦事希圖通同作弊
此蔣全迪與王宣望先後勾通舞弊勒索無厭情

節已據蔣全迪供認不諱查例載侵盜倉庫錢糧入已數在一千兩以上者擬斬監候等語今蔣全迪身為道府大員不思潔已奉公乃與王亶望朋比為奸主令各屬私收折色復公然酌定報灾分數及給發實收多寡肆意冒銷將辦賑銀兩婪索入已此外復收受各屬餽送盈千累萬其黨惡藐法侵帑殃民莫此為甚蔣全迪應照侵盜倉庫錢糧入已數在一千兩以上者斬例擬斬請

旨即行正法以為貪吏害民者戒至該犯子侄親友在
伊任內有無捐監未經給價之人應聽大學士公
阿桂等查明一併歸案辦理奏入得

旨蔣全迪著即處斬餘依議

同日

上命軍機大臣傳諭阿桂李侍堯曰甘省私收折色一
案翫法營私弊端百出現已將首先倡議侵冒分肥
之勒爾謹王亶望王廷贊蔣全迪等俱分別明正典

刑矣至此案大小各員通同侵蝕自應按律問擬以彰國憲而警貪婪但人數較多若概予駢誅朕心有所不忍自當核其贓私之多寡以別情罪之重輕著傳諭阿桂等將各該犯所有侵冒銀兩其在二萬兩以上者俱當問擬斬決二萬兩以下者入於情實其一萬兩以下各犯亦應問擬斬候請旨定奪並分晰開繕清單進呈所有應行定擬案犯俱著趕本年勾到以前具奏毋致延緩

同日

上諭內閣曰甘省收捐監糧一事地方官私收折色任意侵欺捏灾冒賑釀成不得不辦之大案實非朕所喜也且各省偶遇灾歉皆動正項賑卹何獨於甘省賴捐監為乎此後甘省捐監一事竟宜停止將此通諭中外知之

己丑軍機大臣奏言

臣等遵

旨將韓阿渾即馬六十七蕭得福馬達烏特韓三個韓

四個五犯嚴行鞠訊該犯等各判為蘇四十三糾
合回人跟隨攻掠河州城池蘭州關廂及屢次向
華林山賊營送信等情逐一供認不諱實為罪大
惡極應請

旨將該犯等依大逆律凌遲處死奏入得

旨韓阿渾即馬六十七蕭得福馬達烏特韓三個韓四
個俱著即凌遲處死

癸巳阿桂李侍堯奏言

臣

阿桂前奉

諭旨前此被害之文武官弁兵丁查明實在情節將應行議卹者奏聞給予卹典欽此查原任副將新柱原任知府楊士璣在白莊子起台堡等處猝遇匪賊所有跟隨打仗陣亡受傷之弁兵自應一體議卹其被害之知府楊士璣於捏灾冒賑案內婪得多贓城破自盡之河州知州周植亦係侵蝕監糧捏灾舞弊均有應得之罪一併扣除隨同楊士璣前往起台之河州土司韓成璘因公被害亦應議給

卹賞至河州守城各兵俱經駁飭扣除所有與賊
打仗陣亡及受傷真實者方造入冊內但該弁兵
等究屬失守城池應請

旨交部減等議卹奏入

上勅部知之

同日阿桂李侍堯等又奏言臣阿桂前奉

諭旨送回佔據河州該處曾經出仕回籍人員有甘心
從賊不顧名義必當從重治罪欽此查撒拉爾逆回

於三月二十一夜間攻破河州二十三日即由
河州赴蘭滋擾該州並無出仕回籍人員甘心從
賊者業經詳悉查明奏入報

聞

同日阿桂李侍堯又奏言甘省浮冒侵漁各州縣
前經奏明一時乏人委署暫緩叅革茲揀發人員
將次到甘而此等捏灾冒賑之員俱係侵帑營私
大干法紀未便令其尚任地方致滋貽悞應請將

現在甘省六十九員內除陸瑋等十二員已奉

旨革職拏問外其在任之那禮善王臣李元椿伍葆光

唐耀璘閔鵬元孟衍泗陳澍伯衡舒攀桂萬人鳳

杜耕書王萬年舒玉龍伍諾璽周兆熊福明陳韶

楊有澳林昂霄彭永和尤永清丁愈錢成均章汝

楠黃道斐韋之瑗顧汝衡宋樹穀趙元德萬邦英

賈若琳夏恒莘廷颺王璫經方龐樞申寧吉李弼

麻宸謝庭庸承志葉觀海許士梁張毓琳吳說四

十六員請

旨革職拏問以便歸案定擬具奏其丁憂事故尚在甘
省之陳鴻文邱大英徐樹海蒲蘭馨孫元禮沈泰
王旭陳金宣墨爾更額史堂善達十一員應一併
請

旨革職拏問歸案定擬至已離甘省四十三員內除張
何衡等九員已經身故陳棟一員現已革職解甘
奇明現在來甘業經革職外其陞調別省及回旗

之楊賡颺張春芳呂應祥趙杭林陳嚴祖廣福佛
保景福八員及丁憂告病終養降調勒休之何汝
楠陳常鄭科捷陳起撫陶士麟麥桓史載衡林德
基布瞻成德王夢麟劉甫岡顧芝李立博敏劉治
傳閔焜薛佩蘭十八員相應請

旨革職拏問並已經革職之吳鼎新朱家慶周人傑王
汝地崧柱朱桂六員請交留京辦事王大臣及任所
原籍各督撫伊犁將軍將各該員提訊令其逐一

供認如已得實即可定擬具奏設或狡飾即派員解甘質審歸案辦理奏入

上諭內閣曰據阿桂等將甘省捏報灾賑侵蝕帑項之各州縣奏請一併革職拏問一摺所辦甚屬公當此案係前任藩司王亶望與前任蘭州府知府蔣全迪通同舞弊首先作俑以致通省效尤習為固然實有不得不辦之勢至各州縣雖職任大小不同但國家設官分職均宜潔已奉公庶隅有勵豈有因上司勒

令報荒遂爾朋分侵蝕之理况道府州縣即無奏事
之職遇此等事件原可直揭部科使累年積弊早經
破露亦不至貽罪多人朕必嘉其公正特加擢用乃
竟聯為一氣恣飽慾壑置民瘼於不問此而不辦何
以肅吏治而儆官方現據阿桂等查明此案俱已水
落石出朕之辦理實出於不得已且各員等入已賍
私俱自行供認將來定案時朕惟于輕重權衡折衷
至當於按律定擬之中仍寓法外施仁之意至已有

旨詢問而其人仍狡供者必不恕也所有阿桂等此次查明叅奏之知府前任知縣楊賡颺伍諾璽同知前署知州韋之瑗同知前任知縣閔鴻元孟衍泗趙杭林同知善達顧芝張春芳通判賈若琳經方博敏佛保謝廷庸知州那禮善伍葆光覺羅承志陳常知縣陳鴻文王臣李元椿邱大英詹耀璘陳樹伯衡舒攀桂萬人鳳杜耕書舒玉龍福明陳韶楊有渙林昂霄彭永和徐樹梅尤永清丁愈錢成均章汝楠黃道

哭蒲蘭馨顧汝衡孫元禮宋樹穀趙元德萬邦英沈
泰王旭夏恒陳金宣華廷颺墨爾更額王璫龐樞申
寧吉史堂李弼葉觀海何汝楠鄭科捷陳起搗陶士
麟麥桓景福布瞻成德王夢麟麻宸呂應祥陳嚴祖
廣福劉治傳州同前署知縣王萬年州判前署知州
吳詵州判前署知縣薛佩蘭布政司經歷前署縣丞許
士梁縣丞前署知縣周兆熊閔焜縣丞史載衡李立
經歷前署知縣張毓琳等業經降旨革職拏問其已

離甘省及陞任別省各員俱著各督撫迅速派員解赴蘭州交阿桂李侍堯歸案審明分別定擬具奏

同日

上又命軍機大臣傳諭阿桂李侍堯曰阿桂現在查辦甘省一案自已漸有就緒即此時尚未定案並有各省審訊人員陸續解甘質訊者俱可交李侍堯歸案審辦遵照前旨一併分別定擬具奏現在豫省河工漫口開挖引河築挑水壩及堵塞合龍事宜最為緊

要阿桂即可將甘省審案一面交李侍堯辦理一面
起程赴豫督辦

欽定蘭州紀畧卷十六

欽定四庫全書

欽定蘭州紀畧卷十七

乙未

上命軍機大臣傳諭英廉雅德曰前因王亶望於捏災
冒賑一案業已明正典刑並將伊子發往伊犁自備
資斧充當苦差茲據雅德查奏王亶望之子共十一
人長子王裘業經刑部辦理其次子王榮王焯現在
飭提起解此外尚有子八人王祐王紳王晉王越王

瑤王鈺王庚官王海官俱年在六歲以下等語此等重犯將伊子發往伊犁自屬罪所應得但念其年尚幼小若即行發遣朕心尚有不忍著加恩將王祐等八人交雅德嚴行管束待年至十二歲時再行遵照前旨陸續發遣伊犁如雅德離任山西即著交代接任之人遵照辦理

丁酉阿桂李侍堯奏言臣等派委布政使福崧平慶道汪新前往洪濟橋唐家川數處查拏從逆餘

黨及逆犯應行緣坐家屬據該司等陸續稟稱由
洪濟橋渡河住宿唐家川密傳各該處回人鄉約
選派兵役協同搜捕將搜獲逆匪及應行緣坐人
犯分起解省臣等提集嚴訊逆犯馬六六等或為
賊紮筏濟渡或熬茶接待或隨同抗拒官兵各自
供認不諱其應行緣坐各犯非父兄從逆即子弟
黨賊亦質對確鑿俱無疑義應即行正法以彰
國憲其馬復才之兄馬進朝已據拏獲解省在監病

斃當即戮屍至唐家川等處搜獲緣坐婦女九十
五口循化續行搜獲撒拉爾逆回婦女三十口共
一百二十五口應發往伊犁賞給厄魯特索倫察
哈兵丁為奴唐家川等處搜獲緣坐幼男四十名
循化續行搜獲撒拉爾幼男二十五名共六十五
名應發往雲南普洱廣西百色極邊烟瘴充軍奏
入

上從之

同日阿桂李侍堯又奏言臣等遵

旨查勘甘省添建倉廩各案內惟永昌撫彝張掖三處
糧食較多派軍機司員敷倫泰前往勘驗茲據稟
稱該廳州縣所添廩座均經改造但查永昌縣添
建廩座七十間惟五間貯有糧石其餘皆屬空閒
張掖縣添建二百八十間現空閒一百三十二間
撫彝廳添建八十間止空閒十九間預備開徵之
用等語臣等伏思建倉原為貯糧今永昌縣建倉

七十間竟空閒六十五間是舊有倉廩已敷歲貯
何用添建張掖縣雖查有糧四十餘萬石而空閒
之倉有一百三十餘間則四十五年該縣又何必
添廩至二百間之多顯係借貯糧為名希圖暗侵
公帑應請將此二案照西寧等處二十三案例概
不准開銷銀兩著落詳請之員暨各上司分賠其
撫彙廳添建之八十間張掖縣四十年添建之八
十間業據查明實貯糧石尚非虛設惟工料較之

原估多有偷減容臣李侍堯于盤查各屬時另行核減報部至歷年詳請添建之各州縣即係現在審明折收冒賑之員歸案時一併從重定擬惟成縣知縣譚可則任內並未捐監辦災第擅請建倉亦屬弊混應請

旨將該員革職勒限一年賠繳倉費以為藉端捏冒者戒如不能依限繳清仍按律治罪奏入

上勅部知之

九月庚子

上諭內閣曰甘肅捏災冒賑侵吞監糧一案自乾隆三十九年以後通省各官聯為一氣朋分公帑經大學士公阿桂等在甘查辦節次訊錄確供奏請將該員等革職拿問並請將任所原籍貲財一併查封以抵官項業經降旨允行此項自王亶望蔣全迪等首先倡率以致闔省效尤通同舞弊混各州縣亦視侵冒官項為故常竟無一人潔已奉公庸中佼佼者此而不

治以廉弊吏之謂何今既查辦確實不得以罰不及
衆竟置不問朕前降旨云辦理此案實出于不得已
者正謂此也朕既不能道之以德不得不齊之以刑
而無耻之徒方且仍冀其苟免也世道人心澆薄至
此朕甚愧之現在直省各督撫遵旨將各該員家產
查對陸續開單具奏但念此事發覺已久其案內人
犯前聞王亶望拏問之信知事已敗露預為隱匿寄
頓誠不能保其必無而在各督撫查辦此等貪吏自

不敢翫法徇情自干愆咎顧若以查抄嚴密之故或株連拖累有意苛求別生枝節致令外間無識之徒妄滋竊議則各督撫之不能深體朕意也況此等婪得賍私理無久享此時即有隱藏其子孫亦斷無安坐而食之理此天道之昭然不爽者朕之辦理此案權衡審慎祇欲使貪黷營私之吏知所炯戒庶足以勵官常而振法紀非真籍錙銖籍沒之貲財抵償官項也所謂不為己甚去己甚朕之辦理庶務始終期

以此意而已將此通諭中外知之

臣等謹按甘肅大小各員侵帑分肥恣行貪冒其婪得賍私即將家貲盡數籍沒未足相抵我

皇上以辦理此案惟在飭法紀而凜官方俾墨吏共知儆畏非藉此以抵償官項并恐各省督撫不能善體

聖懷或致有意苛求株連滋累

申諭諄切始終不為已甚去已甚之意益見權衡致當

云

同日副都御史汪承霈奏言竊查自乾隆三十九年以後各省赴甘報捐監生不下二十餘萬人今奉

旨停鄉試三科此九年中在奉公守法者或知追悔從前冒昧報捐尚能安于義命但其中保無躁進之徒竟將甘省所捐監生憑依年貌頂替那移而本身則更易名字在部報捐仍復公然入場徼倖中

式乃以原名頂替于同父弟兄三科以後又可冒名就試籍貫三代均屬相同即地方亦無從稽察是混跡科場濫邀名器弊難盡絕且恐開挾嫌告訐藉端滋擾之漸臣竊惟

聖恩寬大與其再犯而懲以冒混之條不若先事而予以自新之路所有此項監生請明定章程通行曉諭該生等如有志上進情愿應試者令其各將在甘所捐監照呈部註銷准以原名在部另行改捐

給與監照遇鄉試年分准予一體應試免其停科
其不應試而情愿銷照另捐者亦聽在部另行報
捐並請勒限二年于限內報捐方准應試如過二
年期滿未經銷照另捐者即作為頂帶榮身不許
赴部重捐雖扣滿三科後亦不准其應試既可正
士子進身之始並以嚴科場冒混之端奏入

上勅部議奏旋經戶部議覆應如所奏准令各生將原
照呈銷以原名赴部報捐應試勒限二年如逾期

不赴部改捐者即作為頂帶榮身不准應試其現
充各館謄錄監生有情愿另捐者亦准其于二年
限內一體赴部報捐再此外尚有廩增附各生在
甘省加捐監生及由甘省所捐監生中試副貢並
有由監生在部捐職捐貢人員亦應酌定章程請
將廩增附各生加捐甘肅監生一體繳銷執照在部
重捐應試其已經中式副貢人員亦令在部補捐
監生方准其入場鄉試至從前由甘省監生在部

捐職捐貢除頂帶榮身不願考試者無庸查辦外
其仍願赴試者亦令于二年限內補捐部監應試
至嗣後有甘省原捐監生情願加捐貢生及職銜
者應令將原捐監生註銷補捐其未行補捐部監
者一概不准加捐奏入得

旨如所議行

辛丑阿桂李侍堯奏言甘省捏災冒賑各州縣內
程棟一員已于在京刑部及

行在供明臯蘭縣兩年辦理災賑浮冒之數約有十
餘萬兩其在甘省陸續取供之陸瑋等六十五員
或餽送王亶望或餽送蔣全迪楊士璣及本管道
府等或代勒爾謹王亶望王廷贊等買辦物件或
供應上司或公幫公捐各項用去外餘剩銀兩俱
係各該員自行花銷據伊等所供按其浮冒銀數
自九萬三千餘兩至二萬一千餘兩者陸瑋等十
九員一萬九千餘兩至一萬四百餘兩者閔鵬元

等三員九千餘兩至一千餘兩者韋之瑗等三十員一千兩以下者夏恒許士梁吳詵三員自應按律定擬以彰

國憲而警貪婪應將侵冒銀二萬兩以上之程棟陸瑋那禮善楊惠言鄭陳善蔣重燾宋學淳李元椿王臣許山斗詹耀璘陳鴻文黎珠伍葆光舒攀桂邱大英陳澍伯衡孟衍泗萬人鳳二十犯均照侵盜錢糧入已數在一千兩以上者斬例請

旨即行正法其一萬兩以上之閔鵬元林昂霄舒玉龍
王萬年杜耕書楊有澳李本楠彭永和謝桓徐樹
梅周兆熊福明陳韶十三犯俱照侵盜倉庫錢糧
一千兩以上例擬斬監候秋後處決入于本年秋
審情實至一萬兩以下之韋之瑗尤永清錢成均
萬邦英丁愈趙元德顧汝衡侯作吳陳金宣王旭
董熙宗開煌沈泰墨爾更額善達華廷颺賈若琳
龐樺史堂覺羅承志李弼中寧吉謝廷庸葉觀海

麻宸張毓琳三十犯亦照侵盜錢糧一千兩以上
例擬斬監候秋後處決一千兩以下之夏恒許士
梁吳詵三犯應照侵盜錢糧一千兩以下例杖一
百流三千里其因路遠尚未調取來省之四十三
員俟續行審明歸案定擬至假捏結報之各道府
內有供認收受屬縣銀兩陳庭學汪臯鶴張金城
鍾廣起等四員其收受銀數自千餘兩至數百兩
不等又未經得受屬員餽送止認捏結之秦雄飛

等六員查該員等舊日所屬各員離甘省尚未訊
供者難以遽定應俟各該員解到後質對明白再
行分別定擬具奏至冒銷銀數據各該員所供合
計約畧浮冒十分之二但該犯等通同舞弊侵貪
害民情節可惡應照所供加倍追出以示懲儆所
有應追銀兩按辦過賬銀十分之四核算于冒賬
各員名下追繳三成其一成于各上司名下追賠
如查對備抵尚有不敷于本人及家屬名下著追

現在總督藩司均已治罪查抄應于各官假捏出結之道府直隸州分賠此內道員所屬較多應追賠一成之四知府直隸州應追賠一成之六如蒙俞允即遵照辦理奏入

上勅軍機大臣會同行在學士九卿核擬速奏旋經軍機大臣會同大學士九卿奏言程棟等二十犯俱侵冒銀二萬兩以上應如大學士公阿桂等所奏請

旨即行正法又閔鵬元等十二犯俱侵冒銀一萬兩以上亦應如所奏擬斬監候秋後處決入于本年秋審情實又韋之瑗等三十犯俱侵冒銀一萬兩以下亦應如所奏擬斬監候秋後處決又夏恒等三犯俱侵冒銀一千兩以下亦應如所奏杖一百流三千里再徐樹梅陳韶二犯折收冒賑得贓逾一萬兩以上錢成均王旭陳金宣宗開煌等四犯得贓雖在一萬兩以下但該犯等俱係冒請建倉于

捏賑開銷之外又復設法侵欺情罪更甚請將擬斬入于本年秋審情實之徐樹梅陳韶二犯俱從重請

旨即行正法其擬斬監候之錢成均王旭陳金宣宗開煌四犯從重入于本年秋審情實以昭炯戒至冒賑捏結各員業將其婪得贓私悉行查封以抵官項所請分作四成及在本人各家屬名下追賠之處應毋庸議奏入

上勅留京辦事王大臣會同大學士九卿科道再行核
擬速奏

癸卯阿桂李侍堯奏言查止捐監生未經捏災冒
賑各員雖違例折收亦有應得之罪但開捐之始
王亶望即主持折色王廷贊即改歸首府總辦積
習相沿州縣不能自主尚與有心舞弊借賑開銷
者不同此等人員任內有冒請建倉者除趙明旭
已于捏結案內革職其西和縣知縣卽維賢及改

教計參之郭之屏劉垌應請一併革職從重定擬其餘各員銀兩應以改歸首府收捐後所定五十兩為准糧數以四十石為准除去公倉費等項銀七兩外每監生一名應多餘銀八兩于各該員名下按所捐監生照數追繳此內一百名以下者即令完繳一百名以上者勒限一年五百名以上者勒限二年一千名以上者勒限三年如限內完清將該員革職留任八年無過方准開復如逾限

不能完繳者將該員叅奏革職仍按律治罪至捏
災案內未經出結止于捏結監糧實貯之道府等
業經革職應毋庸議奏入

上勅該部議奏旋經吏部等議言請將案內現任伏羌縣
知縣楊芳燦等即予革職留任查明各員捐監數
目照阿桂所定年限勒令完繳仍于銀兩完繳之
日起扣限八年方准開復患病調理之寧州知州
范履乾另案降調之環縣知縣楊縉雲等應停其

補用行文按限追繳俟銀兩全完方准起用仍于
補官日革職留任扣限八年開復其已經休致之
敦煌縣知縣李文曾另案革職之正寧縣知縣張
瑾等亦行文按限追繳其病故之伏羌縣知縣楊
瀛等仍在家屬名下著追以上現任候補及休致
另案革職各員如逾限不能完繳各該督撫將該
員參革治罪奏入得

旨如所議行

乙巳陳輝祖奏言臣遵

旨將原任革職安肅道陳之銓丁憂鞏昌府知府潘時
選提解到省率同司道嚴訊據供與州縣折收冒
賑得受分給銀兩又復轉餽上司各情節查陳之
銓潘時選身為道府于所屬折收監糧知而不舉
已屬玩法迨冒災濫銷復敢扶同結報侵盜分肥
法難寬宥應即按律定擬陳之銓潘時選均應照
侵盜倉庫錢糧一千兩以上斬監候例俱擬斬監

候秋後處決奏入

上勅軍機大臣會同行在大學士九卿議奏旋經大學士三寶等議言此案陳之銓潘時選二犯應

勅令該督派員押赴甘省交陝甘總督李侍堯將有無與各州縣通同舞弊之處質訊明確再行定擬歸案辦理得

旨如所議行

戊申

上諭內閣曰王廷贊接任甘肅藩司於王亶望通同屬
員捏災冒賑一案並不據實參奏及早清理乃轉踵
行其弊仍將監糧私收折色且改歸首府辦理又每
名加收心紅紙張銀一兩並派屬員買辦物件及事
已發覺經朕硃筆訓諭令其據實供吐尚敢支吾狡
飾前據行在大學士九卿會審按律問擬斬決本屬
罪所應得因念其本年三月蘭州守城微勞姑從寬
典改為應絞監候茲又續據阿桂等查奏甘省浮銷

賑糧腳價一項王廷贊將腳價銀二萬八千餘兩發交楊士璣收存為辦公之用當經傳諭留京辦事王大臣提訊王廷贊據供原知此項冒開因勒爾謹說有應辦公事遂准其領去楊士璣並未分晰具報等語此案王廷贊始終捏混踵弊效尤即其派令屬員買辦物件一事向來藩臬不准進貢屢經降旨嚴飭更非如勒爾謹身任總督尚可藉口年節買辦土貢者可比是其婪索勒派種種情罪百喙難辭目下已

屆官犯勾到之期王廷贊係情實官犯著即行處絞
仍通諭中外知之


辛亥

上諭內閣曰甘肅捏災冒賑一案骫法營私大小官員
通同一氣為從來未有之奇貪異事故當以重法治
之非不知罪人不孥而此實非常之罪也除王亶望
勒爾謹等分別明正典刑並將伊子革職發往伊犁
以示懲儆至王廷贊將全迪楊士璣程棟等核其情

罪本屬相同伊等之子俱應一律辦理除蔣全迪業經正法並無子嗣毋庸置議外楊士璣賍私累累使其身尚在亦應正法已於蘭州被害倖免刑誅王廷贊現已處絞程棟陸瑋那禮善楊惠言鄭陳善現在審明賍款定擬斬決該七犯俱有子嗣其所捐官職無論是否係伊父在甘省任內出貲報捐俱著查明一體革去並著發往伊犁充當苦差以為貪婪不法者戒

壬子

上諭內閣曰甘肅收捐監生業經降旨停止所有陝西
省收捐監糧並著一併停止



欽定蘭州紀畧卷十七

欽定四庫全書

史部

欽定蘭州紀畧卷十八至二十

編修臣李傳熊覆勘

總校官編修臣程嘉謨

欽定四庫全書

欽定蘭州紀畧卷十八

甲寅

上諭內閣曰甘肅控穴冒賑侵蝕監糧一案昨據大學

士公阿桂等審明各州縣供認入已贓數自九萬至

數千餘兩不等照侵盜錢糧一千兩以上例分別定

擬斬決監候秋流一摺當經降旨令軍機大臣會同

行在大學士九卿核議並交留京辦事王大臣會同

在京大學士九卿科道再行詳加核覆僉稱案內各
犯情真罪當法無可貸按例定擬具奏朕惟州縣為
親民之官平時固宜潔已奉公庶隅自礪若遇有灾
祲尤當竭力撫綏使窮黎共沾實惠至於借賑卹之
名為侵漁之地實從來所未有朕亦不忍以此疑人
乃甘肅各州縣朋比侵吞毫無忌憚且有於捏賑開
銷之外復冒請建倉設法以肥私橐其奇貪肆黷真
有出於意想之外者此案始由王亶望蔣全迪等首

先舞弊勾通上下狼狽為奸但各州縣有上司押令報荒勒索銀兩之事原許其直揭部科朕可簡派大臣按問何數年以來各該州縣視侵帑為故常竟無庸中佼佼者再閱各犯供內有將侵吞銀兩為冬季施粥施衣及修葺廟宇工程之用等語毋論該犯等谿壑難盈必不肯以婪得賍私飾為義舉即地方此等事件各州縣捐廉為惠施及貧民亦職分所應爾何處無之又安得復於事後藉口開銷希圖未減乎

又有稱為驛站貼補者從來驛站為州縣之利藪且各省皆有驛站誰肯破產貼補現在此案爰書已定王大臣科道等復加核擬人無異詞則此等侵帑殃民骫法營私之吏固不能復為曲貸所有案內侵冒賑銀二萬兩以上之程棟陸瑋那禮善楊惠言鄭陳善蔣重熹宋學淳李元椿王臣許山斗詹耀璘陳鴻文黎珠伍葆光舒攀桂邱大英陳澍伯衡孟衍泗萬人鳳等二十犯又冒賑不及二萬兩而任內有侵欺

建倉銀兩之徐樹梅陳韶二犯若照擬一例子以
斬決轉與王亶望蔣全迪等首惡罪名無以稍示區
別程棟等著改為應斬監候入于本年勾到情寔官
犯內辦理今各省官犯已經勾決著派刑部侍郎阿
揚阿馳驛前往甘省會同該督李侍堯傳旨曉諭監
視行刑其侵冒銀一萬兩以上之閔鵬元林昂霄舒
玉龍王萬年杜耕書杜有渙李本楠彭永和謝桓周
兆熊福明等十一犯又冒賑不及一萬兩而任內有侵

欺建倉銀兩之錢成均王旭陳金宣宗開煌等四犯
據王大臣科道等核擬斬監候即入本年秋審情寔
者雖應如所議但程棟既已未減為今年秋審情寔
閔鵬元等亦著從寬免其即入本年秋審仍牢固監
候其侵冒銀自几千至一千兩以上之韋之瑗尤永
清萬邦英丁愈趙元德顧汝衡宋樹穀黃道昷蒲蘭
馨章汝楠侯作吳董熙沈泰墨爾更額善達華廷颺
賈若琳龐檮史堂覺羅承志李弼申寧吉謝廷庸葉

觀海麻宸張毓林等二十六犯俱依擬應斬監候統
俟明年情實官犯勾到時刑部聲明請旨分別辦理
餘俱著照所議完結前經降旨朕于辦理此案不得
不為已甚今酌核諸人罪情仍不忍其斷首受誅就
其中情節最重之程棟等二十二犯先予勾決所謂
不為已甚去已甚寔因吏治民生關係重大不得不
辦之苦心所有辦理此案前後所降諭旨着李侍堯
明白宣諭各屬俾觸目警心共知侵貪之吏天理所

不容即國法所難宥庶幾辟以止辟所全者多也將此通諭中外知之

臣等謹案州縣有牧民之責大法小廉職守應爾若借賑恤為名朋比作奸通省效尤竟無一人惕然為戒實屬從來未有之事甘省捏灾冒賑各犯爰書既定於法均無可寬我

皇上酌核情罪將最重之程棟等先正典刑餘俱稍示區別并令該督宣諭各屬使之觸目警心懲其

既往禁其將來所以為吏治民生計者至深且備矣

同日

上諭內閣曰前因王廷贊楊士璣等七犯侵貪不法業經降旨查明該犯等之子革去官職俱發往伊犁充當苦差今閱阿桂等查奏各犯贓數單內蔣重燾侵冒銀四萬七千四百兩宋學淳侵冒銀四萬七千二百兩又詹耀璘侵冒銀三萬四千五百六十兩外復

開銷添建倉廩銀六千二百五十兩陳澍侵冒銀二萬五千七百兩外復開銷添建倉廩銀一萬八千四百六十兩核其侵冒銀數均在四萬兩以上伊等之子亦應照王廷贊等之子一律辦理著交刑部查明該四犯之子如有官職者即行革去並發伊犁充當苦差以示懲警

乙卯

上諭內閣曰前已降旨停止甘肅陝西兩省收捐監生

所有烏魯木齊新疆捐監著一併停止

丁巳

上諭內閣曰甘省冒賑侵帑一案皆係王亶望為藩司時倡率舞弊以致通省各屬視侵貪為常事轉相效尤毫無顧忌現在程棟等二十二人之死悉王亶望一人導之使陷於伏法即與王亶望殺之何異核其情弊雖寸磔不足蔽辜然而按律斬決無可加增寔覺罪浮於法是以前經降旨將伊子王裘等三人一

併革職發往伊犁充當苦差其幼子八人俟年至十二歲時再行陸續發往現據山西巡撫雅德奏將伊幼子監禁省城恐外省官官相護仍屬有名無實著雅德即將未發王亶望諸子派委妥員小心解交刑部嚴行監禁俟及歲時由刑部陸續轉發並著刑部存記雖遇恩赦不得奏請援宥回籍如王亶望之子有在伊犁及中途脫逃等事即于拏獲地方正法如此辦理於首惡情罪庶足相抵而大員之以侵貪作

備者亦共知炯戒

乙未兩廣總督已延三寺奏言

臣

等將原任靖遠

縣知縣麥桓由番禺原籍行提到案督同兩司研

訊據麥桓供乾隆四十一年在河州州判任內有

靖遠縣知縣囑托省城素識之翟二南轉求蘭州

府蔣全迪鎖營王亶望指缺求補司府各許銀四

千兩入議定辦灾使費司府各四千兩於奉文赴

任時蔣全迪即預填實收六百張勒令補印收捐

造入季報以抵前欠一萬六千之數自到任後計
兩年報灾辦賑冒銷入已共銀一萬九千八百五
十兩隨於四十三年告請終養回籍等情臣等恐
尚有不實不盡仍委員將麥桓押解甘省歸案辦
理奏入

上諭內閣曰甘省收捐監糧一案王亶望蔣全迪等明
目張膽通同舞弊已屬從來未有之奇貪異事乃麥
桓在州判任內膽敢與王亶望蔣全迪等鑽營關說

指闕求官公行賄賂蔣全迪即勒填實收並議定辦
災使費是不特冒賑殃民又復賣官鬻爵目無法紀
至於如此之甚尤堪駭異所有麥桓一案現已據巴
延三等委員解甘着李侍堯嚴行訊究令將夤緣賄
賂各情節據實供吐毋使稍有匿飾審訊明確後着
另作為一案辦理至甘省現據阿桂等審定侵冒各
犯內似此納賄營求者恐復不少除業經審明正法
各犯外其餘案內人犯並着李侍堯嚴切鞠訊如有

似此情節者俱着照麥桓之例另案定擬俾用法營私鬻官行賄者知所炯戒

丙寅阿桂奏言

臣

前次奉到各省營伍賞卹銀兩

開銷正項及名糧裁添養廉

諭旨仰見

皇上聖謨遠大不惜多費帑金為足兵衛民之計惟是國家經費歲有常規有不得不通盤算畫者臣於乾隆十年在銀庫郎中任內曾詳悉查核每年各省所

入地丁關稅鹽課蘆課漕項等銀約三千餘萬兩
災賑蠲緩不在此數此歲入歲出之大畧也又查
康熙六十一年部庫所存止八百餘萬兩至雍正
年間漸積至六千餘萬兩而自西北兩路用兵動
支大半我

皇上御極之初戶部庫銀不過二千四百萬兩自四十
六年以來並未加增賦稅而府藏充實國用富饒
部庫增至七千餘萬兩

皇上以藏富於民為念凡三次普免天下地丁錢糧兩次普蠲各省漕糧以及遇災即賑河工海塘歷年各處用兵凡為捍衛民生計者所費又何啻萬萬在

皇上原不稍存靳惜但此等動支尚非經費可比夫經費驟加不覺其多歲支則難為繼從前開拓新疆二萬餘里每年所費即以陝甘兵額餉銀裁移添補於國用並未加增茲奉

訓諭陝甘各營酌添兵額一萬二千七百餘名西安增設滿兵二千五百名京營添兵四千九百名其馬步糧餉合之各省兵丁賞卹紅白銀兩遵

旨開銷正項約算歲支已有百餘萬兩若又將武職名糧改給養廉其所扣兵馬挑補實額核計歲需又約二百萬兩以每年額增三百萬經費而論統計二十餘年即須用至七十萬兩况武職所得名糧馬乾由來已久營員本不至拮据今

諭旨改照文員之例一體議給養廉固屬核實辦理而其所扣兵餉似毋須盡行挑補實額伏思滇黔等處控制邊陲兵力不宜單弱川省於平定兩金川後內地兵丁移駐新疆未免不敷守禦其他閩廣海疆亦屬緊要均宜查明增添兵額以資彈壓其陝甘兩省業已添滿漢兵一萬五千餘名併此外省分俱係腹地所扣名糧均可毋庸挑補實額再近年以來滿漢兵制裁添改移者甚多歲需經

費是否與從前相仿伏乞

皇上勅交戶部將每年一定出入銀兩數目通盤核算
並將增兵餉養廉三百萬兩之後每年是否尚有
餘存其各省兵額是否無須一律挑補之處交軍
機大臣會同該部一併詳悉妥議奏入

上諭內閣曰大學士公阿桂覆奏各省武職名糧裁添
養廉挑補實額一摺國家經費原當量入為出而足
兵衛民為萬年久遠計者又不得稍存靳惜之見阿

桂現管三庫其所奏康熙雍正年間出入大數通盤
區畫大臣籌國自應如是但朕以泉貨本流通之物
財散民聚聖訓甚明與其聚之于上莫若散之于下
且在官多一分即在民少一分顯而易見朕即位初
年戶部庫銀不過三千萬兩今四十餘年以來仰荷
上蒼嘉佑年穀順成財賦充足中間普免天下地丁錢
糧三次蠲免漕糧兩次又各省偏災賑濟及新疆兩
金川所費何啻萬萬而賦稅並未加增非如漢武帝

之用桑弘羊唐德宗之用裴延齡以培克為事而致
府藏充盈也現在戶部庫銀尚存七千萬兩朕入何
肯稍為靳惜乎且即以歲支頓增三百萬計之至乾
隆六十年歸政之時所用不過四十餘萬兩加以
每年歲入所存其時庫藏較即位時自必尚有盈餘
又何必於此事總總過計乎從前海望在戶部時不
肯明言銀庫寔數其意似恐外人聞之朕彼時即不
以為是國家惟正之供出入歲有常經原屬大公至

正又何必掩人耳目乎甚如明季金花聚斂乃至戶部請內帑亦不肯發則其鄙吝更可笑矣即以內帑而論憶乾隆初年內務府大臣尚有奏撥部庫銀兩備用之事今則裁減浮費釐剔積弊不特無需奏撥且歲將內務府庫銀命撥歸部庫者動以百萬計又何必以部庫不敷歲出為慮乎至于歲入項下惟米豆關稅一節初年曾經免稅原欲使市價日平乃行之日久並未平減殊不滿朕意後因安寧奏請復收

經部議准允行至遇地方歉收穀貴之年原有降旨特免米豆過關之數所以隨時調劑或商賈多往亦救災區米貴之一法耳今阿桂既籌畫及此但朕意究以多添兵力不惜經費為是在廷諸臣自必各有確見所有阿桂奏到原摺並朕此旨一併發抄使中外咸知朕意並着大學士九卿科道詳悉妥議具奏

臣等謹案自古設兵衛民可百年不用不可一日不備我

皇上睿慮周詳多添兵額所以裕武備而振

國威誠鞏固金湯之良法也至馬步糧餉及營武賞

卹均

諭令開銷正帑計歲支已不下百餘萬又以武職名糧

一體改給養廉每年經費共增至三百萬兩

臣

阿桂恐歲入不敷未免鰓鰓過計

皇上明切示諭不稍存靳惜之見惟務為久遠之圖易

曰損上益下謂之益豈特普蠲加賑為藏富於

民已哉

戊辰吏部將甘省緹城連摺之候補縣丞姚起彪帶領引

見奉

旨姚起彪著發往陝西交畢沅以縣丞用並加恩賞給銀一百兩

同日李侍堯奏言監糧災賑案內所有私收折色冒銷賑糧諸弊經臣會同大學士公阿桂查節次

具

奏臣恐首府給發銀兩尚有弊端未盡查出之處隨
令藩司福崧再行確查茲具詳覆前來臣查原任
蘭州府知府楊士璣任內所發實收各縣尚有未
捐而捏報已捐者有此縣所捐銀兩竟為彼縣那
用者又有此縣已捐銀兩業為彼縣那用而仍將
報捐糧數於賑案內開銷者當時原屬任意騰那
輾轉侵用迨楊士璣為賊所害一切弊竇不及彌

縫遂致底裡畢露查乾隆四十五年共發實收四萬三千二十五張又四十四年年底存剩未捐實收八千八百一十二張共實收五萬一千八百二十六張除四十五年分共捐三萬二千七百六十八張四十六年分又捐一千二百七十七張尚餘實收一萬七千七百八十一張前因查出監糧災賑諸弊臣即令藩司福崧將未經填捐之實收盡行提回茲查出四十五年所捐實收內如漳縣寧夏

武威山丹四縣共八百六十五張並未填捐遽行
捏報已捐於是年賑案內將虛糧撥銷計監銀四
萬七千五百七十五兩合糧三萬五千三十四石
又楊士璣經手給發監銀並不按捐監州縣給發
如平番狄道河州會寧張掖西寧碾伯金縣等八
州縣應填實收並未捐完楊士璣輒將他縣所捐
監銀借給使用共那借過銀一十萬七千四十九
兩零其已捐之州縣如安西玉門等二十州縣現

在無項歸款而山丹寧夏平羅漳縣華亭等五縣
因所捐銀兩為他縣那用輒將報捐糧數於上年
賑案內撥銷是監銀已屬無著而虛糧又已開報
尤屬弊中之弊但此等州縣俱係本案問擬重罪
之人資財亦經抄沒實無可著落追賠所有漳縣
等捏報未捐寔收八百六十五張現已傳捐應即
飭司詳查提回註銷至各員虛報糧石私那侵用
無著銀一十萬七千四十九兩零容臣查明細數

統歸假灾冒賑案內辦理奏八

上命軍機大臣傳諭李侍堯曰實收改歸首府摠由王
廷贊飭法營私楊士璣勾通捏冒以致百弊叢生各
州縣視國帑為私財任意騰挪輾轉侵蝕實屬從來
未有之奇事但王廷贊已經正法楊士璣亦被賊害
伊二人之子均已發往伊犁充當苦差於法無可復
加至所有那用監銀開報虛糧入己究係何員任內
自應詳查的實著傳諭李侍堯將那用虛開入己之

各州縣詳悉查核此內已於前案定擬分別辦理者若干員其未經定擬並著李侍堯按照實在入己贓數仍遵前旨分別定擬具奏

十月庚午

上諭內閣曰昨據副都御史汪承霈條奏甘肅監生一摺請以原名准其在部另行改捐給與執照免其停科並請勒限二年報捐如過期不捐雖扣滿三科亦不准其應試等語此等監生逐利熱中希圖省費報

捐即概予褫革原不為過今照部議統限二年准以
原名在部另捐入場應試已屬格外之恩但念該生
等人數衆多從前在甘省上捐時俱係王亶望諸人
引之犯法非盡該生之過況前已出貲今概令重捐
其中寒畯未免志切觀光而力有不逮情殊可憫著
加恩將從前甘肅報捐監生者准其呈明另照在部
捐監之數繳足即給予執照許其科考至定限二年
為期稍近恐外省邇陞一時未能徧曉及至遵例遠

來而限期已過未免向隅著並加恩再寬限三年統限五年為率俾該生等從容報納上進有階以副朕宥過推恩作養人材之至意

辛未李侍堯奏言前任蘭州道叅茸四川川北道熊啟謨現已解到

臣

嚴加審訊據熊啟謨供在甘

肅驛傳道任時鄭陳善送過壽禮四百兩後丁憂離任陸瑋送過奠儀盤費五百兩又口外解到前任寧夏同知已陞鎮西府知府伍諾璽據供署寧

夏任內四十年辦過賑銀八千八百七十餘兩實
散銀七千三百兩餘銀一千五百七十兩四十一
年又辦過賑銀五萬九百九十餘兩實散銀四萬
一千四百五十兩餘銀九千五百四十兩又前任
秦州直隸州知州奇明供四十年在靈州任內辦
過賑銀二萬三千九百餘兩實散銀一萬九千三
百兩餘銀四千六百兩四十一年到秦州任辦過
賑銀八千一百兩實散銀六千五百兩餘銀一千

六百兩四十三年辦過賑銀一萬三千三百兩實
散銀一萬一千二百餘兩餘銀二千一百兩查伍
諾璽侵冒銀款在一萬兩以上請照侵盜錢糧一
千兩以上例擬斬監候秋後處決八於情實竒明
請照侵盜錢糧一千兩以上例擬斬監候秋後處
決熊啟謨請照監臨官勒索所部財物一千兩以
下杖流律從重發往新疆効力贖罪奏入

上勅原議大臣議奏旋經軍機大臣奏言伍諾璽竒明

均應如該督所議定擬仍請遵照前奉

諭旨候明年情寔官犯勾到時將該二犯交刑部一併

聲明請

旨分別辦理又原任蘭州道熊啟謨雖據該督訊無侵
冒情節但扶同捏結又收受屬員銀九百兩自應
按律問擬惟查此等捏結各道府現在陸續解甘
該員等有於屬員辦理災賑案內捏結者有於折
收監糧案內捏結者亦有災賑監糧俱經捏結者

入其中曾否收受屬員銀兩情節轉重各有不同
應請令李侍堯俟捏結各員解齊一併彙案確寔
情罪按律分別定擬具奏以歸畫一奏入得

旨如所議行

十一月己酉李侍堯奏言查監糧災賑案內已離
甘省各員准各處解到叅革原任涇州知州陳常
原任武威縣知縣朱家慶原任平涼縣知縣布瞻
原任合水縣知縣成德前任渭源縣知縣定邊縣

知縣呂應祥原任東樂縣丞李立原署巴燕戎格通

判佛保等七犯

臣

隨率同藩臬兩司逐一研訊查陳

常侵冒賑銀三萬八千兩又捐監盈餘銀二萬兩朱

家慶侵冒賑銀三萬兩又捐監盈餘銀一萬兩應

請將該二犯照侵蝕錢糧一千兩以上例擬斬請

旨即行正法布瞻侵冒銀七千餘兩成德侵冒銀四

千三百餘兩呂應詳侵冒銀三千五百餘兩李立

侵冒銀二千四百餘兩佛保侵冒銀一千七百餘

兩以上五犯均請照侵蝕錢糧一千兩以上例擬斬監候統入明年秋審情實請

旨定奪再查陳常朱家慶二犯贓在四萬兩以上所有陳常之子陳光第陳于豐陳于範朱家慶之子朱聲琨朱聲瑋等應請發往伊犁充當苦差臣一面移咨各旂籍查明解甘發遣奏入

上勅三法司核擬速奏旋經刑部等議言應如該督所奏辦理

同日李侍堯又奏言

臣

查甘省實收歸首府之後

有未捐而捏報已捐者虛糧開銷復冒折色者四

員武威縣知縣李元椿捏捐寔收四百二十三張

計銀二萬三千二百六十五兩山丹縣知縣萬邦

英捏捐寔收二百八張計銀一萬一千四百四十

兩寧夏縣知縣宋學淳捏捐寔收二百三張計銀

一萬一千一百六十五兩漳縣知縣孫元禮捏捐

寔收三十一張計銀一千七百五兩有雖經填捐

而所捐監銀被別縣那用冒銷虛糧折色者二員
平羅縣知縣李耕書計銀一千七百二十五兩
華亭縣知縣華廷颺計銀一千六十二兩至未經填
捐而先那用他縣監銀者八員狄道州知州鄭陳
善那用銀一萬六千四百餘兩會寧縣知縣許山
斗那用銀一萬七千餘兩西寧縣知縣詹耀璘那
用銀一萬二千二百餘兩碾伯縣知縣陳韶那用
銀八千八百餘兩河州知州周植那用銀二萬四

百餘兩署平番縣知縣周兆熊那用銀一萬六百
餘兩張掖縣知縣麻宸那用銀一萬餘兩署金縣
知縣王萬年那用銀一萬一千四百餘兩臣查該
犯等捏灾冒賑已經任意浮銷侵欺罔法復將未
捐未領虛糧開銷侵冒折色弊中滋弊情更可惡
至那用他縣監糧銀犯雖止私相那用並無捏銷
侵冒情弊但所那用銀係屬監糧正項即與侵盜
錢糧無異除周植前因賊陷河州自縊身死鄭陳

善李元椿宋學淳許山斗詹耀璘陳韶業經正法
應毋庸議其王萬年杜耕書周兆熊三犯于冒賑案
內擬斬監候在案今查王萬年原侵賑銀一萬七千
一百一十兩又那用監銀一萬一千四百餘兩周兆熊
原侵賑銀一萬七千四十兩又那用監銀一萬六百
餘兩該二犯侵蝕銀二萬兩以上應照原擬擬斬請
旨即行正法萬邦英原侵賑銀八千五百九十七兩又
冒銷虛糧折色銀一萬一千四百四十兩杜耕書

原侵賑銀一萬五千八百兩又冒銷虛糧折色銀一千七百二十兩麻宸原侵賑銀一千三百一十兩又那用監銀一萬餘兩以上三犯請照侵蝕銀一萬兩以上擬斬監候歸于秋審情實華廷颺一犯原侵賑銀三千四百三十二兩又冒銷虛糧折色銀一千六十二兩應請仍照侵蝕銀一千兩以上擬斬監候至孫元禮一犯查係告病回籍現在咨提截拿尚未解甘該犯于辦灾案内已有侵欺

之項應俟該犯解到併案嚴審從重定擬奏入

上勅軍機大臣會同該部核擬速奏旋經軍機大臣等
議覆應如所奏辦理

上諭內閣曰王萬年周兆熊陳常朱家慶侵蝕銀兩二
萬兩以上俱着照程棟等各犯之例補行予勾其侵
冒一萬兩以上之萬邦英杜耕書麻宸俱入于秋審
情寔仍牢固監候其侵冒不及一萬兩以上之華廷
颺布瞻成德呂應祥李立佛保俱依擬應斬監候

統俟明年情寔官犯勾到時刑部聲明請旨分別辦理餘依議

同日李侍堯又奏言據藩司福崧臬司福寧查得甘省通案冒賑各員已經病故者共一十二犯雖各犯侵冒確數無從查訊第各名下辦過災賑銀糧總數俱有案可稽請照前奏定二分侵冒之數作該犯等人已贓論今查得原任涇州知州張何衢河州知州周植二犯核計侵冒贓數在二萬兩

以上罪應請

旨即行正法原任會寧縣知縣李巨源河州知州葉中
肅州知州康基淵三犯侵冒贓數在一萬兩以上
罪應擬斬入于情寔原任武威縣知縣林德基環
縣知縣何朝炳安化縣知縣劉甫崗礮伯縣知縣
曾道中西河縣知縣胡兆龍正寧縣知縣薛佩蘭
沙泥州判楊士模七犯侵冒贓數在一萬兩以下
查已故之張河衢周植二犯雖贓數不及四萬但

俱係請

旨即行正法之犯今已倖逃顯戮應請將該二犯之子
發往伊犁充當苦差李巨源葉中康基淵三犯雖
贓數不及二萬兩亦係擬斬入于情寔請將該犯
之子查明如有官職即行革去其餘林德基何朝
炳劉甫崗曾道中胡兆龍薛佩蘭楊士模七犯贓
數在一萬兩以下應無庸議奏入

上勅軍機大臣會同刑部議奏旋據軍機大臣等議言

應如該督所奏張何衢周植二犯之子發往伊犁充當苦差又李巨源葉中康基淵三犯之子革去官職以示懲儆查葉中之子葉椿係捐納通判在四庫館行走前於九月內由京逃回本籍經刑部奏請革職行令安徽巡撫查拿續經農起拿獲解京俟解到之時交部另行辦理康基淵之子康儀鈞由舉人捐納中書前經吏部奏請將中書斥革次子康文鐸係甘肅所捐監生業據江西巡撫郝

碩將監照追奪繳銷餘均應如所奏辦理奏入得
旨如所議行

欽定蘭州紀畧卷十八